

吳克潛編

腸胃病與痔瘡病

上海大眾書局印行



萬病自
療叢書

腸胃痔瘡病

目次

第一章 腸胃病

A	通論	一
B	分類	二
	吐瀉	二
	脹痛	六
	霍亂	八
	窄狹	一一
	奇癢	一三
	關格	一三
	失血	一五

腸胃痔瘡病 目次

806217

第二章 腸病

A	通論	一七
B	分類	一八
	腹痛	一八
	腹脹	二〇
	瀉利	二三
	痢疾	二八
	腸覃	三三
	腸鳴	三四
	腸癰	三五
	腸風	三六
	腸出	四〇

第三章 胃病

腸癰	四一
便秘	四四

A 通論	四七
------	----

B 分類	四七
------	----

胃脹	四七
----	----

嘔吐	四八
----	----

胃呃	五二
----	----

胃風	五三
----	----

反胃	五四
----	----

胃痛	五六
----	----

胃癰	六〇
----	----

胃囊

六二

噎膈

六三

節四章 痔瘡病

A 通論

六六

B 分類

六七

痔瘡

六七

內痔

六九

外痔

六九

氣痔

七一

血痔

七二

蟲痔

七三

牡痔

七三

牝痔	七四
腸痔	七四
脈痔	七五
酒痔	七六
諸痔	七七
痔漏	七九
脫肛	八二
附錄胃病痔疾良方	八四

國醫
萬病自
療叢書
腸胃痔瘡病

吳克潛編

第一章 腸胃病

A 通論

吾人出生之後。賴以維護後天之生命者。盡人皆知爲飲食。故飲食者。養命之源也。然有飲食而無腸胃消化之功能。則飲食等於無用。必也飲食由食管而達胃。則胃爲之消化。由胃而達腸。則腸爲之消化。然後攝採精微。營養身體。以充四肢百骸。此腸胃之所以爲後天之本。注重衛生者。不能不隨時加之意也。若腸胃偶沾疾患。小之影響目前之健康。大之短促將來之生命。此腸胃病之所以不容忽視。而必須亟亟調治也。考腸胃病云者。腸胃同病也。其證有虛有實。有寒有熱。有寒熱錯雜。有虛實並見。治之宜因勢利導。積滯痰溼。不可不行。虛寒停頓。不可不溫。熱則不可不清。虛則不可不補。虛實寒熱錯雜並見者。更宜確立治法。隨機應



變。夫如是。庶無因循姑息之患。而得常保健康之旨矣。

B 分類

■ 吐瀉

【病狀】上吐下瀉。或腹中作痛。或作脹作響。吐瀉之物。或渣滓不化。或酸臭異常。或吐瀉清水。或吐多瀉少。或瀉多吐少。

【病因】吐出於胃。瀉出於腸。腸胃有病。則吐瀉交作。其原因多由飲食積滯。不能運化。或感受暑熱。或招受寒涼。或停飲蓄痰。或溼熱醱釀。皆足致此。其有先吐而後瀉者。病由胃及腸。先瀉而後吐者。病由腸及胃。蓋腸胃雖以幽門爲界。而究屬銜接連通者。故胃與腸恆互有牽涉。胃病有時亦能致瀉。腸病有時亦能致吐。又爲胃行其精液者在脾。爲腸分別水穀者亦在脾。脾不健運。則精液不行。水穀不別。壅塞既久。迫而上行。則爲吐。迫而下行。則爲瀉。故腸胃不和。吐瀉之因。脾不健運。亦足以成吐瀉也。

【治療】腸胃之中。最宜清肅。故飲食宜有定。大便宜有時。若腸胃向不清肅。一旦

傷食傷暑。或感冒風寒。清濁之氣交亂於中。吐瀉遂爲引動。吐瀉通治方宜加味四苓散。夏秋炎令。宜冲和湯。飲食積滯。吐瀉渣滓者。宜二陳湯加神麴查炭厚朴麥芽。感受暑熱者。宜燃照湯。感冒風寒者。宜藿香正氣丸。停痰蓄飲者。宜胃苓湯。溼熱醞釀者。宜桂苓甘露飲。去肉桂酌加川連厚朴。熱甚脘悶。吐瀉酸臭者。宜竹葉石膏湯。去人參加神麴枳殼。吐瀉清水。由於虛寒者。宜參苓白朮散。或理中湯酌加附子肉桂。久病脾胃虛弱。易於作吐。易於作瀉者。宜用八仙糕調理之。

一 加味四苓散 治溼熱吐瀉。胸悶脹痛。溺瀦煩渴。

茯苓 豬苓 澤瀉 陳皮 厚朴 半夏 神麴

二 冲和湯 治飲食不化。發爲吐瀉。行氣化積。使臻中利。四時均宜。

厚朴 神麴 白芍 黃芩各錢半 半夏 豆豉 佩蘭各二錢 滑石 赤苓各三錢 甘草五分

三 二陳湯 治胃中寒溼痰濁等證。

陳皮（去白。脅下引痛醋炒。乾欬蜜製。）半夏（生姜汁製。熱痰竹瀝製。妊娠惡阻醋製。）茯苓（停飲心悸。桂枝煎酒製。）各二錢 甘草（炙。痞脹砂仁汁製。）一錢 生姜七片（欬逆痰結蜜煎。）一方有烏梅肉一個（瀉利炒焦用）

四 燃照湯 治暑穢挾溼。霍亂吐下。腕痞煩渴。惡寒肢冷。

草果 豆豉 山梔 省頭草 川朴 半夏 黃芩 滑石

五 藿香正氣丸 治外感風寒。內傷飲食。憎寒。壯熱。頭痛。嘔逆。胸悶。

腹脹。痰嗽。氣喘。傷冷。傷溼。傷暑。霍亂吐瀉。不服水土等證。

藿香 大腹皮 白芷 茯苓 紫蘇 陳皮 白朮 厚朴 桔梗 半夏 甘草 加薑棗

六 胃苓湯 和血補血。治脾胃受溼。飲食停積。霍亂嘔吐。浮腫泄瀉。

四肢痠痛。小便短少。及溼癰水蠱。

蒼朮 厚朴 陳皮 白朮 茯苓各一錢五分 澤瀉 豬苓各一錢 甘草六分 肉桂五分

加生姜三片 大棗三枚

七 桂苓甘露飲 治溫熱病。煩渴引飲。小便不通。上吐下瀉。

滑石 赤苓 澤瀉 石膏 寒水石 甘草(炙) 白朮 豬苓 肉桂

八 竹葉石膏湯 治傷寒胃虛而熱。煩渴作嘔。

竹葉 石膏 半夏 人參 甘草(炙) 粳米 麥冬(去心)

九 參苓白朮散 治脾胃虛弱。飲食不進。多困少氣。胸中痞滿。噫嘔

腹逆。大便不實。

人參 茯苓 於朮 山藥 石蓮肉(去心炒) 白扁豆(去皮姜汁浸炒) 桔梗 砂仁

薏苡仁 (炒) 甘草(炙)

十 理中湯 治中焦脾胃虛寒。不能運化。嘔吐泄瀉。四肢冷逆。身汗

脈虛。不飲不食。胸痹胸痞。

人參 炙甘草 白朮各三錢 乾姜一錢 清水煎服

十一 八仙糕 治脾胃虛弱。食少體倦。易吐易瀉。

人參 茯苓 山藥 芡實 蓮子肉各六兩 研為細末。加糯米粉三升。粳米粉七升。和勻。以白蜜

一斤。白糖二斤八兩。用水熬化。拌藥粉中。置蒸籠上蒸熟。切成條糕。火上烘乾。瓷器收貯。

脹痛

【病狀】腹中或脹或痛。或胃脘作脹而泄瀉。或胃中善飢。腹中作痛。或當臍腹痛。時作噯氣。或腹滿上走胸臆。喘息不甯。或腹滿而痛。脹急而堅。或腹滿時減。按之不痛。

【病因】腸胃有宿食積滯。痰溼停留。邪不從吐瀉而行。則阻塞中宮而爲脹痛。暴怒氣逆。阻塞中宮者。亦作脹痛。脹雖滿而按之減而不痛者。虛也。脹之實而按之不減而痛者。實也。腹中作痛。滯欲行而難行也。臍腹作痛。胃中噯氣者。虛寒也。胃寒而腸熱。則脹而且泄。胃熱而腸寒。則飢而腹痛。若痛有定處。痛不可忍。發熱拒按者。將作癰也。

【治療】腸胃積滯而作脹痛者。治宜行氣化積。用勻氣湯加香附烏藥檳榔麥芽。甚者加大黃芒硝。痰溼停留。以致脹痛者。宜消痰祛溼。用二陳湯加厚朴枳殼大腹皮。甚者加大黃厚朴木香。暴怒氣逆。阻塞作痛者。宜勻氣湯加

烏藥青皮。脹雖滿而按之減而不痛者。宜參苓白朮散。脹之實而按之不減而痛者。宜厚朴三物湯。發熱脈浮數者。厚朴七物湯。滯欲行而難行。腹中陣陣作痛者。宜勻氣湯。加白芍檳榔之屬。或再加神麩麥芽磨積之品。臍腹作痛。胃中噉氣者。宜肉桂當歸炮薑茯苓甘草溫養之。胃寒腸熱。脹而且泄。宜厚朴致和湯。胃熱腸寒。飢而腹痛。宜吳萸致和湯。怪證有腸胃寒極。猝然腹脹如鼓者。濁陰阻塞於中宮。牢不可破。以致神疲肢冷者。宜用火藥二錢。燒酒煎滾。沖服以開之。得吐下則生。然非危急及不解事者。所可用。至於胃癰及腸癰。則另有專條述治也。

一 勻氣湯 治腸胃之氣。阻塞不通。脹悶作痛。

厚朴

枳實各二錢 木香 陳皮 白蔻殼各一錢 清水煎服。甚者倍量用。

二 二陳湯 見前吐瀉類。

三 參苓白朮散 見前吐瀉類。

四 厚朴三物湯 治腹滿痛而便閉者。

厚朴 大黃 枳實 小承氣湯與此方藥味相同。但小承氣湯以大黃為君。此厚朴三物湯以厚朴為君。

五 厚朴七物湯 治腹滿發熱十日。脈浮而數。飲食如故。

厚朴 甘草 大黃 枳實 桂枝 生薑 大枣

六 厚朴致和湯 治胃寒腸熱。脘腹作脹。大便泄瀉。

厚朴 白豆蔻 黃芩 白朮 白芍 木香 檳榔

七 吳萸致和湯 治胃熱腸寒。腹痛能食。

淡吳萸 黃連 白芍 木香 枳殼 神麩 煨草果 煨薑

霍亂

【病狀】勃然上吐下瀉。或先瀉後吐。腹中絞痛。汗出如注。或大渴引飲。或吐瀉酸臭。或吐瀉清水。或腹中擾亂而吐瀉不得。皆謂之霍亂。甚者手足攣急。羅紋麻癢。神氣疲弱。脈微欲絕。

【病因】此證在夏月秋令。患之最多。蓋以人當炎令。腸胃最弱而感受最易。若有

宿食留滯。痰溼交阻。一經感受外邪。觸犯穢濁。腸胃不運。清濁之氣交亂於中。上下奔馳。遂致發爲腹痛吐瀉。名爲霍亂者。形其揮霍擾亂之狀也。此證若數度吐瀉。腸胃所蘊之邪。宣洩無餘。其證自平。若上不得吐。下不得瀉。腸胃之邪已訖於內而不得泄於外。最爲危篤。其有吐瀉過甚。津液已耗而病邪未衰者亦凶。挾食挾溼挾熱而作者常爲較輕。內傷飲食。感受時邪。挾寒而作。肢冷自汗。轉筋拘急。瀉利清穀者常爲較重。若見手足攣急。羅紋麻癘。是爲津液將竭。肝邪鴟張。爲尤重之候也。

【治療】凡傷食傷暑。感冒風寒。以致勃然上吐下瀉。胸腹絞痛者。此爲似霍亂證。宜藿香正氣丸。吐下污濁臭穢。口渴有汗。小便赤而少者。此爲熱霍亂。宜白虎湯或桂苓甘露飲。吐瀉清水。小便利。口不渴者。此爲寒霍亂。卽近今所謂眞性霍亂也。宜四逆湯或附子理中湯。泄水過多。羅紋麻癘者。宜鹽水鍼注射。神氣疲弱者。宜服樟腦白蘭地酒。或用樟腦鍼注射。四肢冷者。宜以生附子搗爛搯擦。或以燒酒搯擦之。凡諸般霍亂。泄水過多。筋不能

榮而為拘急轉筋之狀。皆可酌加木瓜白芍以舒之。乾霍亂吐瀉不得轉筋危急者。宜以鹽湯探吐。或明礬探吐。或先用大黃攻下。再用雷公救疫散灸之。

一 藿香正氣丸 見前吐瀉類。

二 白虎湯 治陽明證汗出。渴欲飲水。脈洪大浮滑。不惡寒反惡熱。及中噉煩熱而渴。

石符 知母 甘草 梗米

三 桂苓甘露飲 見前吐瀉類。

四 四逆湯 治少陰病表熱裏寒。下利清穀。四肢拘急。手足厥冷。脈微欲絕者。

甘草(炙) 乾姜 附子(生用去皮) 加入參名四逆。加入參湯。治霍亂脈微。利而復利。利止亡血。

五 附子理中湯 治脾胃虛寒。飲食不化。四肢厥冷。腸鳴腹痛。霍亂轉筋。體冷微汗。嘔吐泄瀉。一切沉寒痼冷等證。

附子 人參 甘草(炙) 乾姜 白朮

六 探吐法

鹽一撮放刀上。用火炙透。溫水送下。以引其吐。不吐再服。水最宜多。如再不吐。用鷄翎掃喉以探其吐。明礬少許研細。溫水送下。少傾。再用鷄翎掃喉以探其吐。

七 雷公救疫散 外用。治霍亂臍腹絞痛。四肢攣急。

桂心 丁香 硫黃 吳茱萸 加常門子少許 共爲細末納臍中。用老姜一大片蓋於臍上。再用蕪艾放在姜片上燒灸。輕者一次。重者二三次。然後除去姜片。貼上煖臍膏。使藥氣不致外泄。

■ 窄狹

【病狀】飲食不多。食後作脹。胸腹不寬。火旺多怒。

【病因】肥人患此。爲溼痰留滯於腸胃。腸胃不寬。則氣不升降。因而窄狹少食。瘦人患此。爲陰虛火旺。腐濁之氣。逗留腸胃。因而窄狹少食。

【治療】因溼痰留滯於腸胃者。宜越鞠丸平胃散之屬。因陰虛火旺者。宜逍遙散左金丸之屬。

一 越鞠丸

治一切溼痰食火氣血諸鬱。牙疼。口瘡。胸悶。腕痛。腹脹。腹痛。吞酸。腿痠。黃疸。婦女經病。帶下。產後中風。小兒食滯。療瘡疔。腫毒。

香附 蒼朮 川芎 山梔子 神麴 一方有山查炒麥芽。

二 平胃散

治溼滯脾胃不能運化。積飲痞膈。不思飲食。心腹脹痛。口苦短氣。反胃噁心。噯氣吞酸。面黃體瘦。體痛嗜臥。壯熱自利。轉筋肢廢。霍亂吐瀉。風泄水蠱。五噎八噫。胎死腹中等證。常服調氣煖胃。化宿食。消痰飲。辟四時不正之氣。

厚朴 陳皮 甘草 蒼朮 加生姜大棗

三 逍遙散

治肝氣抑鬱。血虛火旺。頭痛目眩。頰赤口苦。倦怠煩渴。寒熱咳嗽。兩脅作痛。臍部脹痛。小腹重墜。婦人經水不調。脈弦大而虛。

樂胡 白朮 茯苓 當歸 白芍 甘草 陳皮 薄荷 煨姜

四 左金丸

治肝火燥盛。左脅作痛。吞酸嘔吐。筋疝痞結。一切肝火之證。並治霍亂轉筋。火邪內熾。及噤口痢。飲食入口卽吐者。

川黃連六兩 吳茱萸一兩 共爲末。水泛爲丸。每服三錢。熱湯送下。

奇癢

【病狀】自覺腸胃之中。時時奇癢。而無處抓搔。

【病因】此證由於火邪鬱結於腸胃。火動則發癢也。

【治療】宜疏腸胃之鬱。而清腸胃之火。用柴胡黑山梔天花粉各三錢。白芍一兩。甘草二錢。煎服甚妥。或用逍遙散去白朮煨姜。加黑山梔知母鬱金之屬。

一 逍遙散 見前窄狹類。

關格

【病狀】飲食艱難。小便閉塞。或飲食不能下咽。大小便俱阻塞不通。謂之上格下

關。

【病因】關格初起。因腸胃之氣閉塞不通。以致上下格拒。久病而成關格。因津液枯槁。腸胃乾涸。僅關而不格。僅格而不關。其病尙可治。上格下關者爲難愈也。

【治療】上下格拒。突然阻塞不通者。宜先以鹽湯探吐。次投辛香通竅之藥。用四香丸。後投苦寒利氣下泄之藥。用濟艱丸。有痰者宜先服二陳湯。再探其吐。久病而成者。上則嘔逆。漸至食管窄狹而成格。下則便燥溲少。大小腸澀而成關。治宜導氣通幽湯去升麻加茯苓麻仁冬葵子柏子仁白蜜煎服。小便不通加黑白丑車前子。如大便乾燥。固結不下者。宜用肥皂水或蜜水灌入腸中以潤之。

一 四香丸 辛香通竅。治其上格。

丁香 沈香 藿香 蘇合香 蔻仁 蘇子 冰片 生姜 陳皮

二 濟艱丸 利氣下泄。治其下關。

大黃 黃柏 知母 牛膝 木通 滑石 車前子

三 二陳湯 見前脹痛類。

四 導氣通幽湯 治幽門不通。噎塞氣不得上下。大便難。

當歸身 升麻梢 桃仁泥 甘草(炙)各一錢 熟地 生地各五分 紅花少許 調檳榔細末
五分服。病重可數倍其量用之。

失血

【病狀】巨口吐血。而大便又腹下血。其色或瘀紫或鮮紅。腹中或痛或不痛。

【病因】腸胃受損。則吐血而兼下血。其已出於經絡之血。逗留腹中。久而始行者。色常瘀紫。新創出血。隨出隨行者。血常鮮紅。損傷不合則血出無度。易成危證。瘀血積滯則堅結不行。亦足釀患也。

【治療】凡腸胃損傷。吐下鮮血。治宜清熱和絡。禁食堅硬辛辣戟之物。用藕汁梨汁鮮生地汁涼飲之。或童便乘熱飲以救其標。再用沖和養血湯治之。若吐下之血。色紫而成塊者。必有瘀積。治宜行瘀和絡。用三七丹皮丹參

當歸桃仁側柏沉香藕節。大便色黑亦爲有瘀。如狂善忘者亦爲有瘀。重者可用桃仁承氣湯下之。再用代赭石牡蠣白芨槐花炭櫻欄炭以止血而理傷。其久病吐血下血。色黯黑而面白者屬於虛寒。宜用乾姜甘草湯酌加玉桂黃芪代赭石血餘炭之類治之。

一 冲和養血湯 治吐下諸血。

白茅根 細生地 白芍 代赭石 藕節 槐花炭 銀花炭 丹皮 加紅花少許

二 桃仁承氣湯 治太陽病不解。熱結膀胱。其人如狂。小腹急結。及

婦人敗血留經。或經閉。

桃仁 大黃 甘草 桂枝 芒硝

三 乾姜甘草湯 治心肺寒而嘔血。或感受寒涼。多食生冷。吐血色

黯黑。面白脈微者。

乾姜 甘草

第二章 腸病

A 通論

小腸者。受盛之官。化物出焉。大腸者。傳道之官。變化出焉。由內經之旨細玩之。知飲食之精微。皆以小腸爲受盛。故小腸賴脾之運化。得將彙聚之精微。傳散四佈。大腸職司傳道。則將變化之糟粕。傳導排泄而出於體外。一旦腸中失其常度。則受盛無權。傳道失職。而諸恙以成。考大小腸互相連屬。病則往往同病。然以其起源言之。則病起於小腸者爲重。而病起於大腸者爲輕也。蓋病起於大腸。不過傳道失職。或糟粕不行。或瀉下過度。其累於小腸者猶淺也。若小腸有病。則飲食之精微。不克四佈。化源既竭。勢必全體俱受其害也。腸病亦有虛有實。有寒有熱。有寒熱錯雜。有虛實並見者。惟主治皆不離於脾。以脾執小腸運化之樞也。另有傷寒一證。治法至繁而變化至多。詳於傷寒專著中。痔瘡一證。屬於大腸之積熱。因其種類多而治法繁。則別爲一章以述之。

B 分類

腹痛

【病狀】腹中作痛。或緩或急。或痛而兼脹。或痛而泄瀉。亦有攻刺作痛。亦有着處作痛者。

【病因】此證多由勞役過甚。飲食失節。中氣受傷。以致爲溼熱所侵。寒邪所襲。氣機不通。邪正交爭。遂爲腹痛。痛之急者多屬實。痛之緩者多屬虛。攻刺作痛。多由沉寒積冷。久不通行所致。着處作痛。勢急拒按者。內癰將成。勢緩拒按或不拒按者。多由痰溼或瘀血所致。

【治療】腹痛作脹。由於飲食停滯。氣機不通者。宜勻氣湯加神麩。山楂。檳榔。烏藥。痛而泄瀉者。宜胃苓湯或厚朴致和湯。濁陰久留腸腑。陽氣不通。脈沉微而腹痛者。宜朮附溫養湯。氣攻臍腹。攻刺作痛。日久不愈者。宜抽刀散。七情鬱結。心腹絞痛。不能飲食。時發時止。發則欲死者。宜七氣湯。凡諸寒作痛。用熟艾八兩。白紙一張。鋪於腹上。紙上鋪艾令勻。以葱白數枚。批作兩

片。鋪於艾上。再用白紙一張覆之。慢火熨斗徐熨。覺腹中熱。腹皮煖。不能禁。卽去熨斗。以帛束之。待冷解去。卽効。或用炒鹽布裹熨。痛處亦効。因負重努傷。或跌撲閃損。痛有定處者。屬於瘀血。宜消血飲。或桃仁承氣湯。加當歸。蘇木。紅花。童便。黃酒。若腹痛而不吐不瀉。痛則吐涎沫清水。時止時作。面色青白赤不定。或腹中塊起。按之不見者。屬於蟲擾。宜殺蟲丸。又時而眩暈。或嘔冷涎。或下白積而腹痛。得辛辣熱湯則暫止者。屬於痰積。宜二陳湯。加香附。蒼朮。芎藭。枳實。薑汁之屬。至於腹痛而勢急拒按。且發熱者。此爲腸癰。或腹皮癰。另條述之。

一 勻氣湯 見第一章脹痛類。

二 胃苓湯 見第一章吐瀉類。

三 厚朴致和湯 見第一章脹痛類。

四 朮附溫養湯 治濁陰久留腸腑。脈沉微。腹痛欲便。

白朮 吳萸 良姜 厚朴 半夏 附子 茯苓 小茴香 益智仁 加姜汁

五 抽刀散 治冷積。

白蠶(入巴豆肉少許同炒黑。去巴豆不用)。高良薑(入斑蝥數枚同炒黑。去斑蝥不用)。石膏蒲(不炒) 糯米(炒黃) 共為末。每服一二錢。

六 七氣湯 治七情相干。氣道壅滯。攻衝作痛。

青皮 陳皮 桔梗 蓬莖朮 辣桂 益智仁 香附子 甘草 半夏 加生姜大棗

七 消血飲 治死血

元胡索 當歸尾 蘇木 桃仁 紅花 赤芍藥 五靈脂 沒藥

八 桃仁承氣湯 見第一章失血類。

九 殺蟲丸 治蟲痛。

鶴蝨 雷丸 蕪荑 檳榔 烏梅 苦楝根 使君子肉 用此方時。宜與保赤之劑相並服。庶無攻伐過甚之嫌。

十 二陳湯 見第一章脹痛類。

腹脹

【病狀】大腹膨脹。按之或堅或寬。

【病因】腹脹有虛有實。主因由脾不運化而成。兼因則由胃弱無力。肺腎虧損。蓋脾主運化精微。肺主氣行治節。腎主分行水。三者失職。則水壅而不流。氣滯而不調。於是阻塞腸腑。腫脹以成。輕者脾氣雖壅塞不行。然肺腎無病。常爲易治。重者脾氣衰敗。肺腎交病。常爲難治也。

【治療】飲食內傷。脾不運化而大腹堅脹者屬實。宜勻氣湯加檳榔香附神麩查肉烏藥之屬。甚者加大黃芒硝以瀉之。多食輒脹。大便艱結者。宜削堅之中。參以扶正。勻氣湯加白朮神麩麻仁杏仁。大腹膨脹。緊硬如石者。或陰囊亦腫。宜大戟甘遂芫花海藻各等分。研爲細末。醱酸調麵。和藥攤於綿紙上。覆貼脹處。氣行水下。脹之虛實參半者。用蝦蟆六隻。將四足繫緊。以腹皮輕輕摩腫處。逐一更換。能行氣消積而不傷其正。虛脹按之不堅者。宜人參白朮湯調養之。其由積水腹腫。兼及眼目四肢者。宜新五皮飲。水腫之半虛半實者。宜五苓散。脾氣衰敗。腹脹經久者。宜實脾飲。或復元丹。

以溫養之。至於鼓脹已成。最難療治。可用調中健脾丸。或三生菴菹酌加黃芪於朮黨參之補益。三稜蓬朮之消導。以治之。或能奏效於一二也。

一 勻氣湯 見第一章脹痛類。

二 人參白朮湯 治虛脹。

人參 白朮 於朮 山藥 白扁豆 厚朴 鷄內金 砂仁 石蓮肉 茯苓 甘草

三 新五皮飲 治一切身腫。

黃芪皮 大腹皮 冬瓜皮 茯苓皮 桑白皮

四 五苓散 治水分有熱。小便不利。煩渴。或水飲內停。臍下悸。

茯苓 豬苓 白朮 澤瀉 桂枝

五 實脾飲 治身重懶食。肢體浮腫。口中不渴。二便不實者。

厚朴 白朮 木瓜 附子 木香 草果 乾姜 茯苓 大腹皮 加生姜

六 復元丹 治脾胃俱虛。發為水腫。四肢虛浮。心腹堅脹。小便不通。

兩目下腫。

附子 木香 茴香 川椒 厚朴 獨活 白朮 橘紅 吳萸 肉桂 澤瀉

七 調中健脾丸 治鼓脹。單腹脹。

人參 蒼朮 黃芪 吳萸 茯苓 白朮 沉香 陳皮 半夏 香附 查肉 苡米 黃連
白芍 蘇子 澤瀉 草豆蔻 萊菔子 五加皮 全瓜蒌 川椒 礞 荷葉 大腹皮煎湯。打
黃米粉糊丸。

八 三生萊菔 治膨脹。

取水萊菔根一枚。周圍鑽七孔。入巴豆七粒。入土種之。待其結子。取子又種。待萊菔根成。仍鑽七孔。入巴豆七粒。再種。如是三次。至第四次將開花時。連根採。陰乾收貯。罐內備用。輕者取一枚。搗碎煎湯服。重者二枚見効。

瀉利

【病狀】大便不實。利下無度。或瀉利渣滓。或瀉利腥臭。或瀉利稀水。或瀉利熱痛。或瀉利清冷。或其色黃赤。或其色青白。

【病因】瀉利者。脾與腸之病也。脾受水溼。不能轉運。或脾氣衰敗。水溼停留。致使

小腸無由分別水穀清濁。遂并入大腸而成瀉。因受熱而瀉者。其質多臭穢。而其色多黃赤。因受寒而瀉者。其質多清稀。而其色多青白。因痰溼停積而瀉者。其質多稠黏垢穢。因飲食不化而瀉者。其質多渣滓穢濁。又瀉利之多少不問。瀉時肛門熱痛者。常爲實證。瀉時但覺清利者。常爲虛證也。

【治療】治瀉利以消積扶脾爲大法。消積之中。大概熱積宜瀉。寒積宜溫。痰積宜化。食積宜消。扶脾之中。大概溼盛爲實。宜滲。土衰爲虛。宜培。瀉之多稀水者。宜多加祛溼之劑。瀉之多渣滓者。宜多加消積之劑。瀉下稠黏垢穢。如屬酸臭。多由溼熱。宜胃苓湯加黃連。暑月用六一散加陳皮澤瀉佩蘭神麩。如屬冷利。多由於寒。宜用陳皮煨姜蒼朮白朮白豆蔻吳萸紫蘇。挾熱而瀉。雖瀉而仍覺後重。小便赤澀者。宜黃芩芍藥湯。瀉而肛門熱痛。暴注下迫者。多熱而兼暑。宜白虎湯或桂苓甘露飲。瀉下清冷稀水者。多由於寒。宜附子理中湯。再如瀉下完穀不化。困倦少力者。多虛而挾溼。宜四君

子湯合升陽除溼湯。滑瀉不禁。大腸寒冷。收縮無權者。宜固腸丸。泄瀉過甚。空洞無物者。爲虛而兼寒。宜萬全丸。加人參白朮陳皮黃芪禹餘糧。有盛暑傷於外。陰冷傷其中。內外受迫而瀉者。多腹痛足冷自利。但小便赤而口氣濁。宜連理丸。有由寒溼化熱而瀉者。裏急後重。數至闔而不能便。莖中作痛。宜八正散。加木香檳榔通之。有腎虛無火而瀉者。天明則泄。一注而空。宜四神丸。有暴注而瀉。大便如水。中有小結屎。欲起又瀉。欲止不止者。小便多清。身冷自汗。此屬於寒。宜漿水散。因宿食不化而瀉者。宜厚朴神麩麥芽枳實山查茯苓之屬。挾痰而瀉者。宜二陳湯加神麩姜竹瀝。

一 胃苓湯 見第一章吐瀉類。

二 六一散 治諸熱證。及熱泄煩躁。小便不通。石淋。癩疹。色紫黑者。

桂府滑石（水飛過淨）六兩 甘草（去皮）一兩 研爲細末。和勻。每服一錢。冷熱水或薄荷燈心湯調下。

三 黃芩芍藥湯 治太陽少陽合病。自利。

黃芩 甘草(炙) 白芍

四 白虎湯 見第一章霍亂類。

五 桂苓甘露飲 見第一章吐瀉類。

六 附子理中湯 見第一章霍亂類。

七 四君子湯 治嘔吐泄瀉。氣短面白。聲微肢困。食少不化。口舌生

瘡。吐血便血。以及胎前產後諸病。凡屬於脾胃虛弱

脈象細軟者皆可治。

人參三錢 白朮二錢 茯苓錢半 甘草一錢

八 升陽除溼湯 治脾胃虛弱。不思飲食。腹鳴泄瀉。四肢困弱。溺黃

脫肛。

蒼朮一錢 升麻 柴胡 羌活 防風 神麴 澤瀉 豬苓各五分 陳皮 麥芽 甘草(炙)

各三分 清水煎服

九 固腸丸 治滑泄。

龍骨 附子 訶子 枯礬 丁香 石脂 高良姜 豆蔻仁 縮砂仁 木香

十 萬全丸 治滑泄。

赤石脂 炮姜各一兩 胡椒五錢 共研末。醋糊丸如梧子大。

十一 連理丸 治胃虛挾食。痞滿發熱及暑瀉。

人參 白朮 甘草 乾姜 黃連 茯苓

十二 八正散 治膀胱結熱。熱淋血淋。甚至大便閉塞。及大小便不

利作痛者。

瞿麥 扁蓄草 木通 山梔 車前子 大黃 滑石 甘草 加燈心 清水煎服

十三 四神丸 治脾腎虛寒。五更泄瀉。不思飲食。或久痢虛痛。腰痠

肢冷。

肉豆蔻(麩裏煨) 五味子(炒)各二兩 補骨脂(酒浸炒)四兩 吳茱萸(鹽湯泡淡再炒)一兩

研爲末。用生姜八兩。紅棗百枚。清水煮爛去皮核。與藥末搗和丸。如梧子大。

十四 漿水散 治太陰少陰中暑。泄瀉身冷。多汗脈弱。

半夏 乾姜 肉桂 附子 炙甘草 高良姜

十五 二陳湯 見第一章吐瀉類。

痢疾

【病狀】大便滯下。裏急後重。甚者一日數十次。所下無多。其狀黏液似凍。似膿非膿。似血非血。赤白相間。謂之痢疾。純下赤色而無白色者。亦曰赤痢。純下白色而無赤色者。亦曰白痢。通常下痢。大都赤白兼有。下純白或純赤者。恆爲少數也。

【病因】痢疾之起源。多由腸中傳化失職。溼熱內伏。先爲其因。再因口腹之不節。時邪之感染。遂致津液受傷。變化爲痢。所以腹痛滯下者。以溼邪膠結。氣不足以引之外達。氣欲行而難行。故痛。溼欲去而又留。故滯也。大抵溼熱之邪傷其氣分者。則腐化而爲白痢。溼熱之邪傷其血分者。則下潰而爲赤痢。氣血俱傷。赤白並下。痢疾之輕者。糞中雜痢。後重不劇。痢疾之重者。純痢無糞。後重劇痛。若痢疾身熱漸發。漸高。旋退而又增。此腸中邪毒深。

入病勢益進。最爲重證。深秋發作者。亦屬重候。其有時發時止者。則病邪竊據。成爲休息痢疾。亦爲纏綿難愈者也。

【治療】痢疾初起。概忌止瀉而宜通利。蓋痢爲腸腑之病。溼熱之邪。非通利不能引之外出也。惟通利之法。約有數端。熱重者通之以苦降。溼重者通之以分利。滯甚者通之以攻下。而初起尙有糞便未盡化痢者。則宜以消食行滯之法爲之治。痢疾通治方有芍藥湯。赤白皆治。氣血並顧。爲初起之主方。若滯下甚急。身熱腹痛。來勢頗盛者。宜通利之中。寓以攻下。凡熱重積多。滯下不暢者。宜木香檳榔丸攻之。溼與熱俱重。須祛溼行滯並行者。宜枳朮導滯丸攻之。痢之熱甚渴甚。後重滯下者。宜白頭翁湯。白痢一症。偏於熱者。宜芍藥湯加杏仁。桔梗。偏於溼者。宜胃苓湯加木香。砂仁。偏於虛寒者。宜二陳湯加炮姜。焦朮。厚朴。木香。砂仁。日久下痢清白。手足厥冷。腹痛不已者。宜附子理中湯。氣虛滑脫不禁者。宜用人參黃芪以補氣。御米殼以固腸。由白痢而變赤白者。宜戊己丸。赤痢一證。偏於熱者。宜白頭翁

湯加黃芩炭槐花炭。偏於溼者宜蒼朮地榆湯。偏於虛寒。服涼藥而下愈甚者。宜四君子湯加木香肉豆蔻炮姜炭地榆炭。赤痢久而不止。虛而欲脫者。宜八珍湯加黃芪升麻之類。手足厥冷。脈漸微細者。宜附子理中湯。休息痢疾。通治方宜駐車丸。氣虛者加補中益氣湯。單方用龍眼肉一枚。包苦參子七粒。日日吞之。頗爲有效。凡休息痢之積滯未清者。宜香連丸。加白朮枳實等以消其滯。積滯已清者。宜人參黃芪加椿根白皮御米殼之類以塞其脫。至於由痢疾而轉下膿血者。可從腸風條參看之。

一 芍藥湯 治痢下膿血。及後重窘痛。

白芍(炒)二兩 當歸尾 黃連(炒) 黃芩(炒)各五錢 檳榔 木香 甘草(炙)各三錢 每服五錢。清水煎服。

二 木香檳榔丸 治一切滯氣。心胸腹脅痞滿。二便瀯滯。

木香 檳榔 枳殼(麸炒) 青皮 陳皮 蓬莖朮(煨切) 黃連(同吳茱萸炒)各一兩 黃柏(酒炒) 香附(醋炒) 大黃(酒蒸)各三兩 牽牛頭末四兩 研爲細末。朴硝泡水和丸。如豌豆

大。

三 枳朮導滯丸 治脾胃困於溼熱。不得運化。胸悶腹痛。積滯泄瀉。

枳實五錢 白朮(土炒) 黃芩(酒炒) 茯苓 黃連(姜汁炒)各三錢 澤瀉二錢 神麩五錢

大黃一兩 共研細末爲丸。

四 白頭翁湯 治厥陰熱利。下重及下利。脈沈弦。渴欲飲水者。

白頭翁 黃連 黃柏 秦皮

五 胃苓湯 見第一章吐瀉類。

六 二陳湯 見第一章吐瀉類。

七 附子理中湯 見第一章霍亂類。

八 戊巳丸 治脾胃受溼。下痢赤白。腹痛。米穀不化。

川黃 吳茱萸 白芍各等分。研末和丸

九 蒼朮地榆湯 治脾經受溼下血。

蒼朮 地榆

十四君子湯 見前瀉利類。

十一 八珍湯 調和榮衛。滋養血氣。治陰虛內熱。脾胃虧損。肌肉消

瘦。婦人胎產崩漏。氣血俱虛者。

當歸(酒拌) 川芎 白芍(炒) 熟地黃(酒拌) 人參 白朮(炒) 茯苓各一錢 甘草(炙)

五分 加生姜大棗。清水煎服。

十二 駐車丸 治陰虛發熱。下利膿血。及休息痢。

阿膠(搗碎。蛤粉炒成珠爲末。以醋熬成膏)十五兩 黃連一斤十四兩 當歸十五兩 乾姜十兩

研爲末。搗篩。醋煮阿膠膏爲丸。如梧桐子大。每服十餘丸。

十三 補中益氣湯 治氣虛。氣少。氣高。氣喘。內傷。勞倦。陰虛。發熱。頭

痛。口渴。表熱。自汗。畏風。惡寒。體倦。語懈。食少。無

味。心煩。脈大。瘧勞。勞淋。遺泄。交腸。凡屬脾胃虛

弱。元氣不足之證。及瘡瘍過服敗毒藥。以致中

氣不足者。

黃耆 人參 甘草 歸身 橘皮 升麻 柴胡 白朮 加生薑大棗。清水煎服。

十四 香連丸 治下痢赤白。白多於赤者。

木香五錢 川黃連二兩 共研細末。陳米飯或煉蜜或醋煮米糊爲丸。如綠豆大。每服一二十九。一方加石蓮肉陳皮。

腸覃

【病狀】腸生有瘻肉如覃。其始生也。大如鷄卵。至其成。如懷子之狀。

【病因】因寒氣客於腸外。與衛氣相搏。氣不得營。因有所繫。惡濁之氣停留。瘻肉乃生。

【治療】普通宜酌用晞露丸。木香通氣散。壯盛者用桂枝桃仁湯。

一 晞露丸 治寒傷於內。氣凝不流。結於腸外。久爲癥瘕。時作疼痛。腰不得伸。

三稜 蓬莪朮 乾漆 川烏 礞砂 輕粉 茴香 青皮 雄黃 穿山甲(炒)各三錢 麝香五分 共研細末。和勻。生薑汁煮麵糊爲丸。如梧桐子大。

二 木香通氣散 治寒氣結癥。腹大堅滿。痛不可忍。

木香 戎鹽 三稜各五錢 厚朴一兩 枳實 甘草各三錢 乾薑 蓬莖朮各二錢 研爲末。每服三錢。

三 桂枝桃仁湯

桂枝 檳榔 桃仁 白芍 生地 枳殼 甘草 加生姜大棗

腸鳴

【病狀】腸中有聲。漉漉如鳴。

【病因】或由寒氣入腹。或由蓄水。或由氣虛。

【治療】腹中寒氣。雷鳴切痛。胸腹逆滿嘔吐者。宜附子粳米湯。有蓄水者。宜胃苓湯。濕熱留腸。水溼相混者。宜二陳湯加黃芩黃連山梔。因臟寒有水者。宜理中湯加肉桂茯苓車前。因中氣虛者。宜補中益氣湯加炮姜。因胃寒侵腸。以致泄瀉者。宜升陽除溼湯加益智半夏。

一 附子粳米湯 治腹中寒氣。腸鳴切痛。

附子 粳米 半夏 甘草 大棗

二 胃苓湯 見第一章吐瀉類。

三 二陳湯 見第一章吐瀉類。

四 理中湯 見第一章吐瀉類。

五 補中益氣湯 見前痢疾類。

六 升陽除溼湯 見前痢疾類。

■ 腸癰

【病狀】數飲不得出。時發殄泄。糟粕不化。

【病因】運化之力弱。則腸癰而不仁。因之水道不通。糟粕不化。清濁不分。發爲殄泄。

【治療】宜五苓散加木通桑皮麥冬。或白朮改用蒼朮。或用吳茱萸散。

一 五苓散 見前腹脹類。

二 吳茱萸散 治腸癰寒溼內搏。腹滿氣急。大便殄泄。

吳茱萸 肉豆蔻 乾姜 甘草 縮砂仁 神麴 白朮 厚朴 陳皮 高良姜

腸風

【病狀】大便下血。或多或少。

【病因】腸中溼熱鬱積。經脈不調。以致血不循經。溢出於腸。時時便血。四射如濺。是謂腸風。或血隨便出。或便中帶血。是爲便血。外因飲食過度。用力不節。損傷陰絡。亦足致此。

【治療】腸風便血。體質者先與瀉青丸一二劑。後與逍遙散加酒煮黃連羌活防風烏梅。體虛者用人參胃風湯。通治宜腸風黑神散。陰分虛弱。血不循經者。四物湯地榆湯合用。腹中疼痛。下清血。肛門腫痛者。用敗毒散加槐角荆芥。卒瀉鮮血。噴出如竹筒者。宜小薊取汁。溫服一升。下血鮮紫。大便燥結者。宜一味槐角膏涼潤之。便血久而不已。面色痿黃。下元虛憊者。宜四君子湯加黃耆當歸白芍。下斷紅丸。因跌撲損傷。以致惡血滲入二腸。下濁物如瘀血者。宜黑神散加老黃茄爲末。其由痢而轉下膿血者。宜阿膠

梅連丸黃連阿膠湯。稠厚鮮血而多者屬熱。宜用黃連槐角淡芩白芍生地犀角之類。稀淡色瘀而少者屬寒。宜黃土湯。

一 瀉青丸 治肝膽實熱。多驚多怒。大便不通。腸風便血。小兒急驚抽搐。痰熱。目直竄視。

常歸 龍胆草 川芎 梔子仁 大黃 羌活 防風

二 逍遙散 見第一章窄狹類。

三 人參胃風湯 治風入胃腸。能食便血。

四君子湯去甘草加當歸白芍川芎桂枝粟米

四 腸風黑神散 治腸風下血。腹疼後重。或肛門脫出。

敗櫻(燒) 木饅頭(燒) 烏梅(去核) 粉草(炙)各一錢 清水煎服

五 四物湯 治一切失血體弱。或血虛發熱。肝邪升旺。或癰疽潰後。

嘔熱作渴。及婦人月經不調。臍腹疔痛。腰中疼痛。或崩中漏下。或胎前腹痛下血。產後血塊不散。惡露不止。凡

屬於血液虧少之病。皆可治。

熟地 當歸 白芍 川芎

六 地榆湯 治便血。

地榆 甘草 縮砂仁

七 敗毒散 治疹後口臭。口瘡唇爛。咽喉疼痛。發熱便血。

生地黄錢半 桔梗 連翹 牛蒡子 天花粉 元參 金銀花各八分 丹皮 柴胡各七分
生甘草三分 黃柏(蜜水炒) 薄荷 赤芍 各五分 熟石膏一錢 加淡竹葉一錢 燈心五十
寸。清水煎。或再加生犀角磨汁沖服。

八 四君子湯 見前瀉利類。

九 斷紅丸 治下血久不止。虛寒色淡晦者。

側柏葉(炒黃) 川續斷(酒煨) 鹿茸(火去毛醋炙) 附子(炮去皮臍) 阿膠(蛤粉炒成
珠) 黃芪 當歸各一兩 枯白礬五錢 共研末。醋煮米糊爲丸。如梧桐子大。每服七十九。空腹
時米飲送下。

十 黑神散 治目睛被損。吐血衄血。婦人難產熱病。胎死腹中。產後

惡露不盡。胞衣不下。上攻心胸痞滿。或臍腹堅脹撮痛。血暈神昏。眼黑口噤。瘀血諸疾。並治產後十八證。

黑大豆(炒)五合 熟地(酒浸) 當歸(酒製) 肉桂(去皮) 乾姜(炮) 甘草(炙) 芍藥

(酒浸) 蒲黃(炒黑) 研爲細末

十一 阿膠梅連丸 治陰虛下痢。至夜發熱。

阿膠 黃連各三兩 烏梅肉 黃柏(炒黑) 赤芍 當歸(炒) 赤苓各一兩五錢 乾姜一兩

研爲細末。和丸如梧子大。每服十餘丸。

十二 黃連阿膠湯 治久痢不止。

黃連(炒) 阿膠(炒) 黨參 白朮 茯苓各一錢 乾姜(炒) 甘草(炙)各五分 木香七分

烏梅三個 加生姜大棗。清水煎服。

十三 黃土湯 治吐血衄血。先便後血。及婦人血崩。產後下痢。

灶中黃土 甘草(炙) 乾地黃 白朮 附子 阿膠 黃芩

腸胃痔瘡病 腸病

■ 腸出

【病狀】此證或腹破腸出。或由肛門而出。或由產門而出。

【病因】因腹受損傷。腸穿出外。或因脫肛而腸出。或因生產而腸出。凡腸出之證。

祇略有傷破而未斷者可治。若暴露過久。受有污損者。亦屬難治也。

【治療】凡腹破腸穿出外者。先以好醋煮熱洗之。隨洗隨入。外用活剝雞皮。乘熱貼上。再服玉真散。自愈。腸出過多者。先將腸收起。用油潤瘡口。卻以通關散吹鼻打噴嚏。其腸自入。若腹皮開裂。用麻縷或搥桑白皮爲線。以花乳石散敷線上。將裏層縫起。外層摻收口藥。以待生肉。至於孕婦難產。盤腸而生。胎未出而腸先下。胎已出而腸不收。宜用淨盆。或漆器盛溫水。寒天用熱水。入香油少許。或濃煎黃芪湯尤妙。將腸滌淨。務令溫煖溼潤。切勿稍沾塵垢。及著乾物。俟兒及胎衣下後。令產母略仰臥。自己吸氣上升。穩婆淨手將香油塗抹後。徐徐托入。或用磁石煎湯服之。腸卽收上。或用薤麻仁四十九粒。研塗產婦頭頂心。腸收則急洗去。遲則有害。或用半夏或

阜角末搖鼻取嚏。腸亦自收。其由脫肛而腸頭出者。治詳痔瘡一章中。

一 玉眞散 治破傷風及打撲傷損項強口噤。

天南星（湯泡七次） 防風各等分。 研爲末。先以熱童便洗淨瘡口。拭乾。搽之。良久。渾身瘡作癢。瘡口出赤水爲效。又以生姜汁和溫酒調下一錢。如牙關緊急。腰背反張。每用二錢。童便調服。

二 通關散 治卒中風口噤氣寒不省人事。

細辛 梟角 薄荷 雄黃各一錢 研爲末。每用少許。吹入鼻中取嚏。（一方有南星半夏）

■ 腸癰

【病狀】其身甲錯。腹皮急。熱而腫脹。痛甚拒按。痛有定處。轉側不便。或繞臍生瘡。膿從瘡出。

【病因】多因溼毒鬱積腸內。或七情抑鬱。飲食不調。或經後產後。瘀血留積。運化不通。氣血凝滯。腸癰遂蘊釀而成。初得之三四日。目赤。七八日。目四眇黑。若能食者。膿已成也。

【治療】腸內生癰。遲緊未成膿者可下之。洪數成膿者不可下。膿從二便出者可

治膿從臍出者死。患腸癰者不可驚。驚則腸斷而死。即坐臥轉側。皆宜徐緩。常進稀粥。食毋過飽。治腸癰初起。腹皮急。按之濡。身不熱者。宜牡丹散。或內托十宣散。加茯苓。小腹堅痞。按之痛。而身發熱者。宜大黃牡丹湯。反側腹中有水聲者。為膿已成。宜千金托裏散。下太乙膏。脈洪數。小腹痛。尿瀉者。此膿滯也。宜牡丹散。或薏苡仁湯。潰後疼痛過甚。淋瀝不已者。為氣血虧耗。宜參耆地黃湯。腸癰雖有大腸癰。小腸癰之別。然治法大略相似。通治初起。宜救腸敗毒至聖丹。已成。宜活腸敗毒散。

一 牡丹散 治腸癰冷證。腹濡而痛。時時利膿。或下血。

牡丹皮 人參 天麻 白茯苓 黃耆(炒) 木香 當歸 川芎 官桂 桃仁(去皮炒)各七

錢五分 白芷(炒) 薏苡仁 甘草(炙)各五錢 研為細末。每服三五錢。

二 內托十宣散 治癰疽不潰。或潰後感冒風邪。及痘疹觸穢伏陷。

寒戰咬牙。飲水瀉渴者。

人參 黃耆(炒) 當歸 川芎 厚朴 防風 桔梗 白芷 肉桂 甘草

三 大黃牡丹湯

治少腹腫痞。按之即痛如淋。小便自調。時時發熱。自汗出。復惡寒。其脈遲緊。膿未成者。

大黃 牡丹皮 桃仁 冬瓜仁 芒硝

四 千金托裏散

治一切瘡腫。發背。疔瘡。

黃耆 厚朴 防風 桔梗 連翹 廣木香 沒藥 乳香 當歸 川芎 白芷 白芍 官桂

人參 甘草節

五 太乙膏

治癰疽潰爛。內癰作丸服。

元參 白芷 當歸身 肉桂 赤芍 大黃 生地 入黃丹熬成膏

六 薏苡仁湯

治腸癰臍突。腹痛煩燥。或脹滿不食。小便澀滯。或淋刺痛。及婦人孕癰。

薏苡仁 瓜蒌仁 牡丹皮 桃仁泥各二錢 清水煎服

七 參耆地黃湯

補氣益血。

人參 黃耆 熟地 茯苓 山藥 丹皮 山茱萸 加生薑大棗

八 救腸敗毒至聖丹 治腸癰初起。

金銀花八兩（煎汁二碗） 當歸三兩 地榆一兩 薏苡仁五錢 清水十五碗。煎至二碗。分作二服。

九 活腸敗毒散 治腸癰已成。

當歸 金銀花各二兩 生甘草三錢 地榆 牛膝各一兩 清水煎。取汁一碗。調乳香沒藥末各一錢五分飲之。

■ 便秘

【病狀】大便不通。或腹中硬痛。努力不下。

【病因】腸中有熱則燥結。血中伏火則滯滯。老年腸中枯燥。津液虧少。大便亦易祕結不行。虛而氣耗者。大便難下。

【治療】腸中燥熱。大便不通。宜鹹苦降之。用黃芩黃連大黃芒硝之屬。腹中硬痛。輕者用小承湯氣下之。重者用大承氣湯下之。夏令血中伏火。大便滯滯。宜黃耆人參湯加生地歸身桃仁泥麻仁泥潤之。不應。再加大黃微利之。

腸中枯澀。大便燥結者。宜五仁湯潤腸湯之屬。因氣虛而大便不行。宜人參黃芪當歸首烏加通潤之劑。因溼風證而大便不行。宜黃芩羌活防風萊菔地黃柴胡川芎之屬。大便常祕者。宜脾約麻仁丸。外治之法。有豬膽汁導法。蜜煎導法。而以橡皮帶灌入大量肥皂水以通便。亦簡捷而易行者也。

一 小承氣湯 治陽明病腹中有燥屎。而氣阻不能輸送於外者。

生大黃 厚朴 枳實

二 大承氣湯 治陽明實熱證。腸中燥屎堅結。腹中滿痛者。

芒硝 大黃 枳實 厚朴

三 黃耆人參湯 治癰疽膿血大泄。敗臭痛甚。或食少發熱。或作痛

少寐。

黃耆 人參 白朮 陳皮 麥冬 當歸身 甘草 神麴 五味子 黃柏 升麻 蒼朮 加
生姜 大棗

四 五仁湯 治氣血虛弱。津枯便秘。

桃仁 杏仁 柏子仁 松子仁 郁李仁

五 潤腸湯 治虛秘。

當歸梢 甘草 生地黃 火麻仁 桃仁泥

六 脾約麻仁丸 治脾約。大便常秘。

麻仁 白芍 枳實 大黃 厚朴 杏仁

七 豬膽汁導法 治陽明病熱結於下。大便不通。

豬膽汁(大者)一枚 瀉汁。和醋少許。以灌穀道中。如一食頃。大便當出宿食惡物。虛人忌用。

八 蜜煎導法 治大便不通。

白蜜七合 納銅器或銀石器中。微火煎熬。稍凝如飴狀。攪之勿令焦。候可丸。卽以蛤粉塗手。乘熱捏作錠。令頭銳。大如指。長二三寸。冷則硬。每用一條。納穀道中。以手急抵住。

第三章 胃病

A 通論

胃者。倉廩之官。水穀之海。吾人飲食入胃。停留之時頗久。磨碎之。腐熟之。消化之。吸收之。胥惟胃是賴。胃力強者。五臟六腑得其營養。而本元強固。胃力弱者。營養欠缺。而身體以衰。蓋胃強則倉廩足。而胃弱則府庫虛也。考胃病之起因。不外飲食過度。飢飽不節。或好食厚味。或好飲醇醪。或食後受涼。或食後中熱。大抵胃氣素強而一時感受者。恆易病而易愈。胃氣素弱而漸積漸成者。恆由輕而重。爲難治。若積久失治。則終身爲患也。又時常暑天。胃氣最疲。飲食少偏。常至不及周轉。而爲病。故胃腸之病。以夏令爲尤多也。至於養胃之法。端在時其飲食。而慎其寒煖。厚味醇醪。不可常用。菓品鮮味。切戒過度。勞後不可遽食。食後不可遽勞。此未病可以先防。而已病可以杜其轉劇也。若治法則實者宜消。虛者宜補。挾感宜化。痰溼宜清。而養肝扶脾。又爲治胃之旁法。固皆應隨證化裁者也。

B 分類

胃脹

【病狀】胃中脹悶。胃脘作痛。鼻間焦臭。不欲飲食。

【病因】胃有積滯。氣不運行。以致阻於中宮。胃脘作脹。

【治療】治宜化積食。行滯氣。用藿香正氣丸。或木香調氣散之屬。有熱者。調胃承

氣湯下之。

一 藿香正氣丸 見第一章吐瀉類。

二 木香調氣散 治氣滯。胸膈虛痞。惡心嘔逆。宿冷腹痛。

木香 白豆蔻仁 丁香 檀香 藿香葉 甘草 縮砂仁

三 調胃承氣湯 治太陽證汗後惡熱。譫語心煩。中滿脈浮者。

大黃 甘草 芒硝

嘔吐

【病狀】飲食入胃而上泛。回出者謂之吐。其間有聲有物者。名之曰嘔。無聲有物者。名之曰吐。有聲無物者。名之曰噦。嘔吐其通稱也。

【病因】嘔吐起源。多由飲食不化。胃熱薰蒸而成。或露腹受寒。觸穢感熱。胃氣被

困鬱而勃發。新病暴作。易發易愈。飲食久傷。漸發難愈。或痰溼水飲。停蓄不行。消化之路受阻。亦常發爲嘔吐。

【治療】飲食不化。薰蒸化熱。在腸者最易致瀉。在胃者最易致吐。吐而食物不化者。宜二陳湯加山查麥芽神麩。枳實川朴。吐而夾水夾痰者。宜平胃散加半夏茯苓。凡感寒而吐。有腹痛吐清涎等證象者。治宜祛寒化積。用紫蘇煨姜橘紅白豆蔻半夏木香白朮之類。若因蟲擾而嘔吐不能服藥者。宜用炒川椒十粒煎服。再隨證處方。凡挾熱而吐。有惡食煩怒等證象者。治宜清熱降氣。用黃連生姜神麩枳實青皮大黃之類。凡觸穢而吐。有昏悶口臭等證象者。治宜芳香化濁。用藿香佩蘭厚朴白芷菖蒲神麩香豆豉之類。（夏月胃氣疲弱者多見之。）嘔之初起。宜用小半夏湯治之。暴嘔挾有胃火者。酌加黃連。挾有痰氣者。酌加竹茹。嘔而口渴者。酌加蘆根。嘔出酸水苦水。挾有肝火者。酌加左金丸。嘔出清水而口渴。水入又嘔者。酌加五苓散。嘔而兼吐食者。酌加陳皮神麩之屬。因蟲擾而嘔者。酌加黃連。

川椒之屬。或用烏梅丸以安之。嘔之虛實參半者。其勢雖緩。然常時止時作。宜補胃調中。用大半夏湯和之。胃陽虛而濁陰上逆者。先用逍遙散疏其鬱。繼用人參白朮山藥之屬以補之。脾胃虛弱。不能運化。致水到咽輒嘔。或由胃底腸中傾翻而出。宜六君子湯加砂仁炮姜。或加葶澄茄肉桂之屬。肝陰胃液。兩皆虛耗。服熱藥嘔雖暫止而愈發愈劇。舌苔剝者。宜滋液養胃。熄風鎮逆。用六味地黃丸加扁釵斛石決明滁菊西洋參之屬。突然嘔吐。困倦自汗。胃氣暴傷者。治宜附子理中湯多加白朮。至於常年嘔吐。按時而發。謂之反胃。另條述之。

一 二陳湯 見第一章吐瀉類。

二 平胃散 見第一章窄狹類。

三 小半夏湯 治支飲痰積膈上。喘嗽嘔噦。

半夏 生姜

四 左金丸 見第一章窄狹類。

五 五苓散 見第二章腹脹類。

六 烏梅丸 治虺厥。吐虺。久痢。

烏梅 細辛 桂枝 附子 人參 黃柏 乾姜 黃連 蜀椒 當歸

七 大半夏湯 治反胃嘔吐。

半夏 人參 白蜜

八 逍遙散 見第一章窄狹類。

九 六君子湯 治脾胃虛弱。不能運化。胸滿腹脹。大便溏泄等證。

人參 白朮 茯苓 半夏 甘草 陳皮 加生姜 大棗

十 六味地黃丸 治腎精不足。虛火上炎。面生雀斑。頭目眩暈。咽喉

燥痛。口舌瘡裂。耳聾齒搖。腰膝痿軟。骨熱痠痛。足
跟痛。小便淋瀝。或不禁。遺精夢洩。水泛為痰。自汗
盜汗。亡血消渴。尺脈虛大。婦人經事不調。小兒虛
損。腎疳腦熱。瘡毒。

熱地 山茱萸 乾山藥 丹皮 白茯苓 澤瀉

十一 附子理中湯 見第一章霍亂類。

胃呃

【病狀】胃中有氣上逆。呃呃作聲。

【病因】胃中有熱。或胃中受寒。胃氣驟然不和。致發呃逆。

【治療】胃中有熱而作者宜五汁飲。胃陽虛而肝木上犯者宜代赭石人參丁香

皮茯苓淡乾姜半夏。胃氣虛寒手足厥冷者宜理中湯加丁香白朮枳殼。

或丁香柿蒂湯。久呃不止者宜沈香散。

一 五汁飲 治溫病口渴。吐白沫黏滯不快。又治因熱呃逆。

梨汁 荸薺汁 蘆根汁 麥冬汁 鮮藕汁(或用蔗漿)

二 理中湯 見第一章吐瀉類。

三 丁香柿蒂散 治寒呃。

丁香 柿蒂 各二錢 研為末。每服一錢。

四 沈香散 治久呃

沈香 紫蘇 白豆蔻仁各一錢 研爲末。每服五七分。柿蒂湯調下。

胃風

【病狀】頸多汗。惡風。飲食不下。膈塞不通。失衣則臙脹。形瘦而腹大。食寒則泄。

【病因】多因風冷乘虛。入客於胃。或飲食後乘涼所致。

【治療】有寒熱者宜小柴胡湯。善食而易飢者宜白虎湯加人參。通治宜胃風湯。

一 小柴胡湯

治傷寒惡風。往來寒熱。胸脅苦滿。嘿嘿不欲食。心煩喜嘔。口苦耳聾。脈弦而數。或胸中煩而不嘔。或渴或不渴。身有微熱。或腹中痛。或脅下痞鞭。或心下悸。小便不利。或咳。凡屬少陽經半表半裏之證。宜和解者。

柴胡 黃芩 人參 甘草 半夏 生姜 大棗

二 白虎湯 見第一章霍亂類。

三 胃風湯 治風冷乘虛。入客腸胃。水穀不化。泄瀉注下。腹脅虛滿。

腸鳴疝痛。及腸胃溼毒。下如豆汁。或下瘀血。日夜無度。婦人妊娠久痢。胎漏黃汁。

人參 茯苓 川芎 肉桂 當歸 白芍 白朮各等分 研爲粗散。每服二三錢。清水煎服。

反胃

【病狀】反胃亦稱胃反。亦曰翻胃。狀其食入而復吐出也。或食入卽吐。或朝食暮吐。宿食不化。久而成習。

【病因】胃氣虛弱。食久不化。停而不下。則成反胃。亦有虛中挾火者。亦有虛寒無火者。縱或能食。吐出多而存留少。久則漸成噎膈而不下。

【治療】食後冷涎不已。隨卽吐出。或心腹痞痛者。宜藿香安胃散。吐出原物。酸臭不化者。宜理中湯加川連。甚則加丁香附子。胃弱有痰。以致食不能化而吐者。宜二陳湯加丁香藿香雞內金。若痰涎壅塞。飲食入咽卽爲裏住不得下者。宜來復丹控其痰涎。腹中嘈雜不寧。或作或止。心下懊懣。面有白點者。此蟲積也。宜秦川翦紅丸。反胃而飲辛熱輒呃者。此瘀血在膈。阻滯

氣道也。用代抵當丸作芥子大。服二錢。去枕仰臥。細細嚙之。以消降其瘀血。又凡反胃之因熱者。多見面紅手足熱。食已卽吐。宜二陳湯加姜炒黃連黃芩及山梔神麩麥芽之屬。反胃之因寒者。多見嘔青手足冷。食久乃出。宜二陳湯加乾姜吳萸。或附子丁香肉桂之屬。反胃之因虛者。多見脈弱吐緩。宜四君子湯四物湯酌用。加牛羊乳以潤之。切忌香燥之藥。更有大腸枯燥。水不下行。反上泛而吐水盈盆者。宜熟地山萸麥冬當歸菴蓉五味元參白芥子牛膝以潤之。不可徒用利水之藥。以誅伐無過。重竭其津也。

一 藿香安胃散 治脾胃虛弱。食卽嘔吐。

藿香一錢五分 丁香 人參各二錢 橘紅五錢 研爲細末。每服二錢。加生姜三片。清水煎服。

二 理中湯 見第一章吐瀉類。

三 二陳湯 見第一章吐瀉類。

四 來復丹 治上盛下虛。裏寒外熱。及痰飲。伏暑。霍亂。泄瀉如水。婦

人產後敗血衝胃。

硝石 硫黃 玄精石一兩 五靈脂 青皮 陳皮各二兩 如法製研爲末。醋煮米糊和丸。

五 秦川煎紅丸 治膈氣反胃。

雄黃 木香各五錢 檳榔 三稜 蓬莪朮 貫衆 乾漆 陳皮各一兩 大黃一兩五錢 研爲細末。水煮麵糊和丸。如梧桐子大。

六 代抵當丸 治蓄血。瘀血。血痛。

大黃四兩 芒硝一兩 桃仁六十枚 當歸尾(酒洗) 生地黃 穿山甲(蛤粉炒)各一兩 肉桂三錢 研爲極細末。煉蜜和丸。如蓄血在上焦者。丸如芥子大。

七 四君子湯 見第二章瀉利類。

八 四物湯 見第二章腸風類。

胃痛

【病狀】胃脘不舒。隱隱作痛。或悶或脹。或作劇痛。俗稱心胃氣痛者。實卽胃脘痛也。

【病因】胃氣壯則邪不能干。虛則著而爲病。偏寒偏熱。則水停食積。與氣相搏而爲痛。

【治療】挾熱而痛者。宜二陳湯加枳實厚朴川連梔子白芍黃芩。感寒而痛者。宜草果朴姜丸。甚者用葶澄茄一粒。納去核棗中。草紙包。水溼透。煨存性。或酒或米湯下。日一枚。七日愈。（亦治反胃甚至嘔吐黑汁者。）因氣攻刺作痛者。宜沈香降氣散。加味七氣湯。因瘀血作痛者。（飲湯水下或作呃。口中或作血腥氣脈澀。）宜歸尾川芎丹皮蘇木紅花元胡索桂心桃仁紅麴番降香通草大麥芽穿山甲之屬。或用桃仁承氣湯下之。胃中有酒食痰諸積。一遇觸犯。便作痛者。通治宜二陳湯。挾怒氣者。酌加青皮香附姜炒川連。挾飲食者。酌加炒山梔麥芽草果山查。挾酒氣者。酌加枳椇子葛花。犯風寒者。酌加參蘇飲。又凡寒溼客胃。身體沉重。面色痿黃而作痛者。宜朮桂湯。外感涼風。內食冷物。卒然作痛者。宜二陳湯加草薢仁乾薑吳萸。因蟲而痛者。面生白斑。唇紅能食。鼻癢腹膨。上半月蟲頭向上易治。

下半年蟲頭向下難治。宜先用雞汁糖蜜飲之。再以集效丸下蟲。或川椒十數粒煎湯下烏梅丸。（參看嘔吐類）因身體羸弱。脾胃虛寒。或久服寒藥致痛者。宜溫胃湯或理中湯。大概胃痛按之差者屬虛。按之甚者屬實。得食差者屬虛。得食甚者屬實。便結宜通。瀉利宜溫。此體察病情之大法也。

一 二陳湯 見第一章吐瀉類。

二 草果朴姜丸 治感寒胃痛。

草果 厚朴 良姜 菖蒲

三 沈香降氣散 通順氣血。治一切留飲氣滯。胸脅痞悶。喘促短氣。

噫醋吞酸。婦人經水不調。少腹刺痛。

沈香二錢八分 甘草五錢五分 縮砂仁七錢五分 香附子六兩二錢五分 研為極細末。每服

二錢。空腹時淡姜湯或鹽湯調下。

四 加味七氣湯 治七情鬱結。心腹攻痛。

蓬莪朮(醋炒) 青皮(醋炒) 香附(醋炒)各一錢五分 元胡索 薑黃各一錢 草豆蔻仁
陳皮各八分 三稜(炮) 益智仁 藿香各七分 桂心五分 甘草(炙)四分 清水煎服。死血
胃脘痛。加桃仁紅花各一錢。

五 桃仁承氣湯 見第一章失血類。

六 參蘇飲 治感冒風寒。頭痛發熱憎寒。驚風煩悶。脘悶嘔惡。痰熱

作搐。欬嗽氣逆。涕唾稠黏。脈弱無汗。產後感冒欬嗽。

人參 紫蘇梗葉 乾葛 前胡 半夏 赤茯苓各七錢五分 枳殼 厚 苦桔梗 甘草各
五錢 剉散。每服二錢。加生姜二片。清水煎服。

七 朮桂湯 治寒溼體重。脘痛面黃。

蒼朮三錢 桂枝五分 麻黃一錢 杏仁十粒 草豆蔻仁 半夏 澤瀉 神麴(炒)各五分
陳皮 茯苓各一錢 豬苓 黃耆各五分 甘草(炙)二分 清水煎服。

八 集效丸 治虫積四肢常冷。

木香 鶴蟲 檳榔 訶子肉 蕪黃仁(炒)各五錢 大黃一兩 熟附子 炮姜各三錢 烏梅

肉十四枚 共研細末。煉白蜜爲丸。如梧桐子大。

九 烏梅丸 見第三章嘔吐類。

十 溫胃湯 治服寒藥多。致脾胃虛弱。胃脘痛。

白豆蔻三分 益智 砂仁 厚朴 甘草 乾姜 姜黃各二分 黃耆 陳皮各七分 人參

澤瀉各三分 研爲細末。每服三錢。清水煎服。

十一 理中湯 見第一章吐瀉類。

胃癰

【病狀】胃中生癰。漸至成膿。身熱。吐出膿血。

【病因】多因飲食積聚。或好飲醇醪。或喜食煎燂。或七情久鬱。熱毒之氣。累積於

中。以致變化生癰。

【治療】初起寒熱如瘧。身皮甲錯。或欬嗽。或嘔膿血。脈沈細者。宜射干湯。風熱固

結。唇口嚙動者。宜薏苡仁湯。或清胃散。實證脈象沈數。猶未成膿者。宜清

胃射干湯。將欲作膿者。宜托裏散。心胃間痛。吐膿腥臭者。宜牡丹散。痰氣

上壅者宜甘桔湯。虛者宜托裏透膿湯。將愈宜托裏養榮湯。

一 射干湯 治胃脘癰。

射干 梔子仁 赤苓 升麻各一兩 赤芍一兩 白朮(生)五錢 研爲粗末。每服五錢。清水煎服。

二 薏苡仁湯 見第二章腸癰類。

三 清胃散 治脾胃溼熱。中脘作痛。唇口腫痛。齒齦潰爛。痛引頭腦。

或惡寒發熱。作渴飲冷。口舌生瘡。或滿面發熱大痛。喜寒惡熱。小兒重舌馬牙。吐舌流涎。

升麻五分 生地(酒洗) 當歸(酒洗)各四分 川連 丹皮各三分 研爲細末。清水煎服。

四 清胃射干湯 治胃癰。脈象沈數。

射干 升麻 犀角 麥冬 元參 大黃 黃芩各一錢 芒硝 梔子 竹葉各五錢 清水煎服。

五 托裏散 治一切惡瘡。發背。疔疽。便毒。脈洪弦實數。腫甚欲作膿。

者。

大黃 牡蠣(煨) 瓜蒌根 皂角刺 朴硝 連翹(去心)各三錢 當歸 金銀花各一錢 赤芍 黃芩各二錢 研為粗末每服五錢。水酒各半煎服。

六 牡丹散 見第二章腸癰類。

七 甘桔湯 治胃癰痰壅。

甘草 桔梗 麥冬各一兩 清水煎服。

八 托裏透膿湯 治侵腦疽已成未潰。亦治癰疽氣虛膿清。

人參 白朮(土炒) 穿山甲(炒研) 白芷各一錢 升麻 甘草節各五分 當歸二錢 生黃耆三錢 皂角刺一錢五分 青皮五分 清水煎服。

九 托裏養榮湯 治氣血俱虛。或膿血大泄作渴。發熱。

人參 黃耆(炙) 當歸(酒拌) 白芍藥(炒) 熟地黄 麥冬(去心) 川芎 白朮各一錢 五味子(研) 甘草(炙)各五分 加生姜大棗。清水煎服。

胃囊

【病狀】生於胃旁。其形如囊。凡有飲食。必入此囊。雖食飽而肚仍飢餓。初起一二日一吐。吐出食物。並無氣味。肉食則化。米食不化。久則三四日一吐。若至五六日一吐。則難救。

【病因】過貪口腹。偏嗜不節。濁氣停聚。積久生囊。

【治療】製附子五錢。雲苓一兩。每日煎服二次。服至三日。吐出食物必變氣味。再服三日則吐一半。再服三日則不吐。後用六味地黃湯加油當歸火麻仁研末。煉蜜爲丸。每早服五錢。晚服芝麻五錢。服至數日。胃囊必從大便而出。重者形如牛皮。輕則如紙。

噎膈

【病狀】飲食入咽。阻礙不得下也。

【病因】多因氣血虧損。復憂思悲恚。致脾胃受傷。血液枯槁。食管動作無力。致難以推進其食物於胃中也。或痰濁內塞。阻礙道路。亦足致此。

【治療】此證頗爲難治。蓋方欲健脾理痰。則燥劑有妨於津液。方欲養血生津。恐

潤劑有礙於中州。須審其陰傷火旺者以潤養其血爲先。脾傷氣虛者以溫補其氣爲主。治法。因血槁者。用地黃麥冬當歸煎膏。入乳汁韭汁童便。蘆根汁桃仁泥和勻。細細呷之。有冷積結滯者。用理中湯加川烏頭蜀椒。川連巴豆霜皂莢末蜜丸。涼開水送下十五丸。後以四君子湯加黃耆橘紅砂仁調理。食物下咽。自膈而下。梗澀微痛者。汚血在胃口也。用四物湯加韭汁生姜汁竹瀝童便驢尿牛羊乳蜂蜜煎膏潤利之。然後以代抵當丸下之。喉中如有肉塊。食不下者。用昆布二兩。洗去鹹水。小麥二合。水三大盞煎。候小麥爛熟。不拘時服。仍時噙昆布兩三片。嚥津極效。胸中久寒。嘔逆氣上。飲食不下。結氣不消者。宜五膈丸。凡治噎膈單方。用牛反草煎水服有效。鹿肚草（活鹿破腹。取其腹內所食之草。）陳倉米灶心土各三錢。水煎服有效。通治方宜啓膈散。酒膈。以葛花爲君。加用雲苓半夏陳皮甘草。老人食管枯澀。飲食難下者。宜膈噎膏。大抵此證最宜靜養。初愈之時。驟食粥飯。多致不救。宜人參煎湯少加炒陳米。漸漸進之。驟食作飽。

多致不救。犯忿怒色慾之戒者。亦難痊也。

一 理中湯 見第一章吐瀉類。

二 四君子湯 見第二章瀉利類。

三 四物湯 見第二章腸風類。

四 代抵當丸 見前反胃類。

五 五膈丸 治飲食不得下。手足冷。上氣喘急。

麥冬三兩 甘草二兩 蜀椒 遠志 桂心 細辛 乾姜各一兩 附子(炮)一枚 人參一兩
研爲細末。煉蜜爲丸。如藥物難下。作大丸口噙之。

六 啓膈散 治噎膈

沙參 丹參 茯苓 川貝 杵頭糖 鬱金 砂仁殼 荷葉蒂 爲散。清水煎服。

七 膈噎膏 治噎塞膈食。

人乳汁 牛乳汁 蘆根汁 人參汁 龍眼肉汁 甘蔗汁 梨汁 生姜汁 熬膏服之。

第四章 痔瘡病

A 通論

飲食之消化。在於腸胃。腸胃通暢者。津液四佈。糟粕下行。疾病自無由而生。若腸胃之氣不調。濁氣停留。上出爲吐。下出爲瀉。膠固蘊釀而爲種種之腸胃百病。痔瘡其一端也。痔瘡之成因。常由飲食熱毒之氣。積於腸中。其氣時時下注。入於大腸。若大便不通。或通而不暢。則蘊結於大腸之中。發爲痔瘡。故金匱言小腸有熱者必痔。素問言飽食腸癖爲痔。大凡久居溼地。或飲酒過度之人。最易罹此。則以酒與溼易於釀熱。大便祕結之人。亦易罹此。則以便祕則腑氣不通。而熱蘊於腸也。是故痔之初起。多由腸熱。若能調節飲食。戒除嗜好。務使大便通暢。痔疾常因而得痊。倘成痔之後。仍恣貪口腹。不戒房事。則潰不收口。成爲痔漏。陷爲虛證。勢必難治。至久漏管深者。往往終身不愈。然則俗以十人九痔。視爲小恙。今觀其流弊如此。詎又可忽視不察哉。

B 分類

■ 痔瘡

【病狀】痔瘡初起。肛門外四旁。忽生紅瘰。先癢後痛。遂成爲痔。其狀種種不同。先小而後大。生肛門之內者爲內痔。糞由痔中出。痛苦最爲難堪。生於肛門之外者爲外痔。距糞出之道稍偏者。無甚痛楚。若適當糞出之道。每大便亦覺痛辣難忍。痔瘡之輕者。圍便尙可。痔瘡之甚者。常便中夾血。又往往每便脫肛也。

【病因】多因湯中溼熱。大便不調。蘊釀而成。

【治療】痔瘡初起。宜消痔丸。外用消痔千金散。痔之在內者。宜用喚痔法。生草烏尖五分。或生草烏尖五分。加磁石一兩。枯礬五錢。乾姜三分。共研極細末。用生姜汁或葱汁調藥末塗肛門上。少頃。痔自肛門脫出。上下洗淨。再上護痔藥。（護痔法）白芨錢半。大黃一錢。苦參一錢。寒水石一錢。菘豆粉一錢。黃柏一錢。共研細末。以熟水塗四邊好肉上。然後用枯痔法。（枯痔

法)用明礬白砒各四錢。輕粉硃砂各三錢。先將礬入銅杓內烙滾。次入砒末。攪勻以礬枯爲度。去火毒片時。再入輕粉硃砂。研極細。瓷罐收藏。每日三次。以溫湯洗淨痔上。唾津調塗保護四邊良肉。其痔卽枯落。至於結線取痔有結線法。於痔疾初起。用大田螺一個。入銅青麝香冰片各五厘於螺中。少頃。取流出之水塗之。若堅硬者。以五倍子散唾津調塗之。兼用朴硝。蔥頭煎湯洗之。頂大帶小者。用藥線勒於痔根。每日緊線。使其痔枯落。隨以月白珍珠散摻之收口。若頂小帶大者。宜枯痔法枯之。又痔瘡已成。通常內服藥。以槐角丸爲最妥。

一 消痔丸 治痔瘡痔漏初起。人壯便秘。血分壅熱者。

生地黃四兩 片苓一兩五錢 金銀花 枳殼 秦艽各一兩 防風 製大黃 當歸 蒼朮
(米泔水浸炒) 地龍 槐豆(炒) 赤芍各二兩 共研細末。煉蜜爲丸。

二 消痔千金散 外用。治痔瘡。

孩兒茶 黃連 寒水石各五分 硼砂 赤石脂 爐甘石各三分 熊膽二分 冰片一分 共研

細末。清茶調敷。腫痛立止。

三 五倍子散 外用。療痔瘡腫墜。

川文蛤(大者)一枚。先敲一小孔。用陰乾荔枝草揉碎。塞入令滿。用紙塞孔。溼紙包煨。片時許取出。去紙。研爲細末。每一錢加輕粉三分。冰片五厘。共研極細末。

四 月白珍珠散 外用。治痔瘡。撒之。兼治下疳腐爛。猪脊髓調搽。

青缸花五分 輕粉一兩 珍珠一錢 共研爲末

五 槐角丸 治痔漏。

槐角子 槐角花各八兩 檳榔四兩 黃芩三兩 刺蝟皮二個 共爲研末。蜜丸如梧桐子大。另方槐角枳殼當歸地榆防風黃芩。治大腸火盛。腸紅下血。

內痔

【病狀】痔之形似一菌。大如茶杯。糞從菌中出。疼痛難忍。四邊墳起。中心低漏。

【病因】同前。

【治療】宜用草烏爲末。口水調點肛門。痔卽反出。乃可敷治。先用溫水洗淨。以洞

天膏攤如碗大。套菌根下。貼糞門四邊。圍護好肉。免沾藥汁。用枯痔散一二分。口水調。用筆敷菌之外面四旁。菌之中心通糞門。不可敷藥。敷則大痛難忍。日夜二次。一二日毒水流。菌亦漸縮而軟。再敷一二日。漸硬而黑。菌邊亦漸脫落。然後每藥一錢。加硃砂一分。照前調敷。敷至菌根落盡全愈。內服用豬大腸六兩。蚯蚓十餘條。煮融。去蚓食腸。

一 洞天膏 外用。治一切紅腫。熱毒。癰癤。

先用壯年頭髮一斤。菜子油三斤。入鍋熬至髮枯。去渣聽用。再用活牛蒡草。生菊花（連根）活蒼耳草（連根）生金銀藤。生馬鞭草。生仙人掌。對坐草。各一斤。入菜子油十兩。熬至草枯。瀝盡渣。再加白芷甘草五錢。脂當歸各八兩。入鍋熬至藥枯。瀝盡渣。俟油冷。將前熬頭髮之油。合共稱過斤兩。每油一斤。用黃丹（炒透）七兩。入油內攪勻再熬。熬至滴水成珠。以不黏指為度。離火冷透。收貯。

■ 外痔

【病狀】痔之生於肛門之外者。

【病因】同前。

〔治療〕宜瓦花（又名瓦竇塔）同冰片搗敷。或五倍子五枚冰片五厘研細末。麻油調敷。或用外痔神消散薰洗。內服用槐角丸。神應黑玉丹。

一 外痔神消散 療外痔。

紅梔子（搗碎） 黃柏 胡黃連各一兩 水兩碗。煎至一碗。二煎三煎俱煎一碗。共三碗。去渣。入皮硝一斤。燉化。撤去泥脚。取上清硝汁。以文火慢煉成硝。另用大田螺十六個。每個入冰片一盞。待螺化成水。將水拌入硝內。再加熊膽兒茶各五錢。研細。和入硝內。拌勻聽用。用法。頭一次用苦參一兩。水三碗。煎成二碗。去渣。入製硝末一兩。煎二三滾。傾入盆內。先薰後洗。日三次。連洗數日。其痔自消。

二 槐角丸 見前痔瘡類。

三 神應黑玉丹 治新久腸風痔瘻。痛癢難忍。

刺蛻皮 槐角各三兩 豬後懸蹄甲四十九枚 牛角鯁（剉） 亂髮（皂角水洗） 敗櫻各二兩
苦棟皮一兩二錢五分 生芝蔴 雷丸各一兩 乳香五錢 麝香一錢 共研末。酒煮麵糊爲丸。如梧桐子大。每服八九丸。

氣痔

【病狀】痔之遇有憂恐鬱怒。立見痔痛。大便艱難。強力肛出而不收者。

【病因】同前。

【治療】宜加味香蘇飲。並以枳壳防風各一兩。白礬(研)二錢五分。清水煎。乘熱

薰再洗。

一 加味香蘇飲 治氣痔。

橘皮 枳殼(炒) 槐花(炒) 川芎各一錢五分 桃仁(去皮炒) 木香 檳榔 紫蘇莖葉

香附 甘草(炙)各一錢 加姜棗。清水煎服。

■ 血痔

【病狀】痔之每大便時。有清血隨下。如線射出者。

【高因】同前。

【治療】宜涼血地黃湯。柏葉湯。

一 涼血地黃湯 治血痔。

生地三錢 黃連 當歸各一錢五分 甘草 生梔子(研) 元參各一錢 黃芩二錢 清水二

鍾煎至八分。量病上下服。

二 柏葉湯 治吐血便血。

側柏葉 當歸 生地 黃連 枳殼 荊芥穗 地榆各一錢 甘草(炙)五分 清水煎服

蟲痔

【病狀】痔中生蟲。肛門亦流血不止。

【病因】同前。

【治療】宜取隄柳根上鬚一把。同花椒白芥子。煎湯熏洗。其蟲頭黑身白。既由孔痔出。餵鱷魚骨燒烟。熏肛門。其蟲盡死。槐白皮煎濃汁浸洗。冷即易之。良久大便欲解。當有蟲出。

牡痔

【病狀】痔之肛邊腫痛。生肉珠如鼠奶。時潰膿血。

【病因】同前。

【治療】宜加味槐角丸。五痔散。

一 加味槐角丸 治牡痔。痔漏。腸風下血。

槐角子 生黃耆 生地 當歸身各二兩 川芎 阿膠 白芷各五錢 黃連 條芩 枳殼 連翹 防風 秦朮 地榆 升麻各一兩 研為細末。煉蜜或酒糊和丸。

二 五痔散 治一切痔。

左懸豬蹄甲 露蜂房 鼈甲 蝟皮各五錢 蛇退一條。各燒存性為末。每服二錢。入麝香少許。井水調下。

■ 牝痔

【病狀】痔之肛邊腫痛。生瘡突出。腫五六日自潰。出膿血。

【病因】同前。

【治療】宜五痔散。或用當歸生地枳殼連翹槐角升麻黃芩黃柏黃連陳皮荊芥

防風地榆之屬。

一 五痔散 見前牡痔類。

■ 腸痔

【病狀】痔之肛內結核。痛而有血。寒熱往來。登圍脫肛者。

【病因】同前。

【治療】宜腸痔丸。

一 腸痔丸 治腸痔。

槐花(炒) 白礬(煨枯)各一兩 附子五錢 共研細末。蒸餅爲丸。如梧桐子大。

■ 脈痔

【病狀】痔之肛邊生瘡。顆顆發癢。癢而復痛。便時出清血者。

【病因】同前。

【治療】宜神應黑玉丹。釣腸丸。皂角刺丸。

一 神應黑玉丹 見前外痔類。

二 釣腸丸 治脈痔。

生附子(去皮臍) 枯綠礬各一兩 煨訶子 炒枳殼 生南星 白附子 半夏 枯白礬各二兩 鷄冠花(微炒)五兩 瓜蒌 蛻皮 共煨存性各二個 胡桃十五兩 罐內煨存性。共研末。

醋糊爲丸。如梧桐子大，每服二十九。空腹臨臥時溫酒送下。

三 皂角刺丸 治脈痔。

皂角刺二兩（煨存性） 防風 槐花各七錢五分 蛇床子 枯白礬 枳殼 白蒺藜（炒去刺）
羌活各五錢 焦蜂房 五倍子各二錢五分 槐角三錢 共研細末。醋調絲苳粉糊和丸。如梧
桐子大。每服五十九。食前苦楝煎湯送下。外用熱童便入白礬末。淋洗肛門。

酒痔

【病狀】痔之飲酒輒發。以致腫痛流血者。

【病因】同前。

【治療】宜乾葛湯槐角丸。

一 乾葛湯 治酒痔。

乾葛 枳殼（炒） 半夏 生地 赤苓 杏仁各一錢五分 黃芩 甘草（炙）各五分 清水二
鍾。加黑豆一百粒。生姜五片。白梅一個。煎至一鍾。食前服。

二 槐角丸 見前痔瘡類。

諸痔

【病狀】痔之種類至多。形狀不一。除上述外。尙有風痔（因於風者）。鷄心痔（痔之形如雞心者。治宜槐角丸。神應黑玉丹之屬）。雞冠痔（痔之形如雞冠者）。雞肝痔（痔之形如雞肝者）。鼠奶痔（痔之形如鼠奶者）。鼠尾痔（痔之形如鼠尾者）。羊奶痔（痔之形如羊奶者）。牛奶痔（痔之形如牛奶者）。蓮花痔（痔之形如蓮花者）。翻花痔（痔之形如翻花者）。蜂窠痔（痔之形如蜂窠者）。穿腸痔（痔之穿腸而生者）。菱角痔（痔之形如菱角者）。雌雄痔（痔之相偶而生者）。子母痔（痔之子母相生者）。懸珠痔（痔之形如懸珠者）。鈎腸痔（痔之一種）核桃痔（痔之形如核桃者）。栗子痔（痔之形如栗子者）。珊瑚痔（痔之形如珊瑚者）。擔腸痔（痔之一種）。串臀痔（痔之串臀而生者）。垂珠痔（痔之形若垂珠者）。珍珠痔（痔之形如珍珠者）。櫻桃痔（痔之形如櫻桃者）。蜆肉痔（痔之形如蜆肉者）。血箭痔（每便則鮮血

如箭而下者。）等種種之不同。

【病因】同前。

【治療】風痔宜風痔丸。鷄心痔等俱宜槐角丸。神應黑玉丹之屬。血箭痔初起宜生熟二黃湯。若唇白面色痿黃四肢無力者。宜十全大補湯。

一 風痔丸 治風痔。不問有頭無頭。

藜蘆（燒灰） 天麻各五錢 皂角針二錢 乾姜五錢 蓮子草 明礬 硫黃各一兩 大苦瓜
蕪一枚 麝香五分 如法製煉為丸。

二 槐角丸 見前痔瘡類。

三 神應黑玉丹 見前外痔類。

四 生熟二黃湯 治懸癰。

熟地 生地各三兩 柏子仁 丹參 當歸（酒蒸） 白芍（酒炒）各二兩 丹皮（酒蒸） 山藥（乳蒸） 茯苓（乳蒸）各一兩五錢 澤瀉（鹽水蒸）一兩 敗龜板（童便浸炙酥） 遠志（甘草水泡透） 研為細末。用金釵石斛四兩。金銀花十二兩。熬膏。和煉蜜搗丸。每服四錢。早晨淡鹽

湯下。

五 十全大補丸 升陽滋陰。治諸虛百損。五勞七傷。

人參 熟地 白芍 白朮 茯苓 黃耆 肉桂 當歸 川芎 甘草

■ 痔漏

【病狀】痔漏多因痔瘡既潰之後。純服苦寒之藥。致脾元日損。肌肉難生。或妄用刀鍼藥線。鉛丸利剪。致良肉受傷。或日施藥絃。插入拔出。致將瘡肉四旁新肉磨成硬管。愈插愈深。始猶淡紅微腫。或生小核。久則外而槁白。內而黑爛。淫蟲惡臭。污穢不堪。且終年破流血水。真陰由此而耗。往往變爲癆瘵焉。

【病因】同前。

【治療】痔漏宜外用塗灸淋洗諸法。塗法用片腦一分。熊膽三分。蝸牛。田螺肉各十兩。煨灰橄欖核朴硝各五分。先將蝸牛田螺肉搗爛。入餘藥。浸水中一夜。取水併藥敷。無不斷根。或用琉璃餅敷貼。或用柏油一兩。置有釉盆內。

納入大蜈蚣一條。勿令逸去。俟其將油食盡。用竹簽釘住。竹刀剖開。取腹內油塗痔漏上。塗時先將膿血洗盡。亦效。灸法將頭垢捏成餅子。先置於痔上。上覆蒜片。以艾灸之。淋洗法用瓦松。皮硝。川椒。地骨皮。槐條。各等分。用鼈一個。煮湯煎藥。傾桶內。先熏後洗。花椒。艾葉。葱白。白茄根。馬齒莧。皮硝。五倍子。各等分。煎湯先熏後洗。露蜂房。白芷。苦參。煎湯。無風處熏洗。日三次。十大功勞葉五錢。槐花一兩。煎湯先熏後洗。如打噴嚏。其管即脫下。內服宜退管丸。痔漏丸。槐角丸。或用活磁石六兩。打如豆大。以白芨水浸。硫黃爲衣。晒乾。入陽城罐內。鐵蓋蓋定。鹽泥封臍。用火升七炷香。冷定開視。其藥祇有三錢。刮取之。再用珠砂。明礬。火硝。青鹽。各四兩。入陽城罐內。升如前法。再刮取之。再用紋銀一兩。硫黃三錢。白砒三分。傾入銀罐內。煉化。攪成粉。將三項藥。各用等分。米飯爲丸。每服一分。空腹白芷煎湯送下。半日許下部作脹痛時。以手拍左右肢。其管退出。外用生肌藥收口。若欲管退速。可用葶麻子一兩。煎水熏洗。痔漏已久。氣血虛者。宜人參。甘枸杞。

生地。當歸身。各一兩五錢。茯神。麥冬。酸棗仁。遠志肉。酒炒白芍各八錢。粉甘草五錢。土炒白朮一兩。共研細末。猪心血略加煉蜜爲丸。如梧子大。每服七八十丸。臨臥時無灰酒送下。宜戒房慾。忌火酒葱蒜生酒小鷄。永斷羊肉。至於痔之調攝。則炙燂辛辣等物。概須禁忌。每晨服淡鹽湯一杯。能防痔於未發。既發則清火瀉熱。亦頗有裨於治療。平時食柿餅。功能潤腸清熱滋陰。食葶齊。清火消痰化積。皆於患痔者有益。他如戒房事。戒飲酒。戒食有毒鮮發之品。尤須遵守。臨圍須清潔。勿登污穢不堪之坑廁。更所以免傳染也。

一 琉璃餅 治痔漏。

琉璃燈(炙) 陳芥菜(切碎)各五錢 螻蛄殼(陰陽瓦焙)三錢 刺蝟皮(煨灰)六錢 田螺二個(冰片化水) 珍珠三粒 除田螺外。餘均研細。卽取田螺水和藥。乘溼捏成餅。先用陳芥菜入砂鍋內煮湯。以此湯傾入小口瓶內。對患處薰洗。洗後拭淨。將藥餅放患處頂上。膏封。一日一換。痔管內仍用所存藥末。鴨毛管吹入。

二 退管丸 療痔漏。

當歸(酒洗) 露蜂房(用槐樹上者微炒) 川連(酒炒) 象牙各五錢 槐花(微炒) 川芎(炒) 乳香(包在新鮮箬葉內去油淨) 各三錢。共研細末。黃蠟二兩。熔化為丸。如梧桐子大。每服三十九丸。空腹時。漏蘆爐甘石煎湯送下。其管退出。用翳翳去。亦有化為膿血出者。

三 痔漏丸 治痔漏。有退管生肌之効。

石蓮蓬 冬青子各三兩 川連 川芎 牛膝 赤芍 當歸 黃芩 黃柏 熟大黃各一兩
槐角子 象牙末各二兩 蛇蛻皮(去頭尾) 全蠍各五錢 金墨一錠重三錢 共為細末。蜜丸如梧桐子大。每服三錢。每日早晚用柳鬚花椒煎湯熏洗。

四 槐角丸 見前痔瘡類。

脫肛

〔病狀〕肛門脫出不收。或臨大便時。肛門脫下。

〔病因〕多因氣虛所致。凡老人氣血已衰。小兒氣血未壯。及生產久痢。用力太過者。多患之。或因久患痔漏。以致虛而脫肛者。

〔治療〕因大腸熱甚而脫者。宜升麻湯加羌活黃芩黃連。因腸風下血而脫者。宜人參胃風湯。腸胃燥瀉。大便祕結。努掙太過。因而脫肛者。宜人參固本丸。加槐角。大腸虛而挾熱。肛門紅腫者。用槐花槐角等分。羊血拌。炙熟爲末。酒送服之。因虛寒而脫肛。不紅腫者。宜猬皮散與理中湯。老人虛人。用力過度而脫者。宜十全大補湯。因瀉與痢下過度。大腸氣虛而脫者。宜補中益氣湯。又凡腸頭作癢。多因腹中有蟲。或酒色過度所致。宜內服黃連犀角散。外用朴硝煎湯洗之。

一 升麻湯 治大腸有熱。時邪頭痛。及脫肛之因於腸熱者。

升麻 白芍 甘草 葛根 加生薑葱白

二 人參胃風湯 治風入胃中。能食便血。

人參 白朮 當歸 白芍 川芎 桂枝 茯苓 粟米

三 人參固本丸 治肺勞虛熱。咳嗽失血。自汗盜汗。水泛爲痰。及肺虛脫肛者。

人參五錢 生地 熟地 天門 麥冬各一兩 研爲細末。煉白蜜爲丸。如梧桐子大。

四 猬皮散 治血汗。

刺猬皮 燒灰。每服二三錢。

五 理中湯 見第一章吐瀉類。

六 十全大補湯 升陽。滋陰。治諸虛百損。五勞七傷。老人氣虛脫肛。

人參 熟地 黃耆 白朮 當歸 白芍 肉桂 川芎 茯苓 甘草 加生姜大棗

七 補中益氣湯 見第二章痢疾類。

八 黃連犀角散 治狐惑。咽乾聲啞。肛門生蟲。

黃連五錢 生犀角一兩 木香一錢五分 烏梅肉十個

附錄胃病痔疾良方

編者經多年之研究。製有治胃病之特效良方名胃之寶。其藥味之配合。兼有各種治胃成藥之利而無其弊。增一分不可。減一味不效。方錄於後。希採用者照法

配合。勿予更改。如委託吳氏醫室代配者。每瓶收回成本八角。半打四元。

胃之寶 主治一切胃痛。一切嘔逆。心胃氣痛。肝胃氣痛。空心作嘔。反

胃吐食等證。有病治病。無病強身。

真正紫肉桂（普通玉桂無用。走油者無益有害。）二錢 雞內金一兩 四川雅連（別處黃連性燥不能用。）三錢 華澄茄（陳一年以上者。新者性暴不合用。）三錢 法半夏三錢 淡乾薑三錢 陳香櫞（陳三年以上者。一年以上者勉強可用。）三錢 蓬莖朮（醋製）五錢 眞薺芎一兩 全當歸一兩 用金石斛五錢煎長湯代水泛丸。一料全愈。其加減服法。另印說明書。可以函索。痔瘡一證。最好內外兼內。治服用痔之寶。外治用千金散。此兩方經過無數實驗。平安有效。皆錄於後。俾患者採用。如委託吳氏醫室代配者。內服痔之寶。酌收成本每料八元。外治千金散酌收成每本料四元。

痔之寶 治一切大腸火盛。內痔外痔。大便見血。肛門作痛。

槐角子 槐角花各四兩 檳榔二兩 黃芩一兩五錢 炒黑荆芥五錢 地榆五錢 當歸一兩

刺蝟皮兩張 此方不可增減。用蜜水泛爲丸如梧桐子大。每服二三錢。

千金散 外用治痔瘡有效。

孩兒茶 黃連（真四川雅州產者） 寒水石各一錢 硼砂 赤石脂 爐甘石各六分 熊膽
四分 大梅片二分 珍珠五分 共研細末。清茶調敷。腫痛立止。

中華民國二十五年四月重版

腸胃病與痔瘡病

全一册

▲定價六角五分

(外埠酌加郵費匯費)

編輯者 吳克潛

發行人 樊劍剛

印刷者 大眾書局

出版者 大眾書局

總發行所 上海四馬路 大眾書局

代售處 各省各大書局



#41

164343

164343

